

IESU KERISO
MAURI DALANA

232 LON

MOORE COLLEGE
LIBRARY


IESU KERISO MAURI DALANA

MOORE THEOLOGICAL COLLEGE LIBRARY




3 2042 10026398 1

Published by the
Australian and New
Zealand Committee
of the
London Missionary
Society,
Sydney, 1937.



“ A oi na ba hereva, hahediba
maoromaorona hegeregerena.” (Titus
2 : 1.)

“ Ini na ba hadibalaidia bona ba
hahealolaidia danu. Tau ta ese bema
hadibalaidia idau, bona ita eda Lohiabada
Iesu Keriso ena hereva maoromaorodia
bona hahediba danu Dirava ibadinana
hegeregerena basinema gwaurai bou, ia
na guhi amo e nesemu, gau ta asi dibana,
henanadai bona hepapahuahu danu e
ura heni kavamu, to unu amo e varamu
gaudia bini, vagege, heai, ere dika, lalo
gwau dika, heai herea, lalodia didika
bona hereva momokani vada e rakatania
taudia ediai.” (1 Timotheus 6 : 3-5.)



Ekalesia tauna Dirava ihelalohadailaina

Lau ese Dirava na badinaiamu, ia na Tamada, gau iboudiai gubai tanobadai Ia ese vada e havaradia, Ena lalokau be Taunimanima.

Iesu Keriso na Dirava ena lalokau Natuna, iseda Lohiabada, na abidadama heniamu.


Ia ese Tamada ena dala vada e hamaorolaida, Satauro dorinai vada e mase.

Garai vada e ^{he was sent in} atoa vareai, Laumana ese mase vada e hadarerea, bena harihari Tamada dekenai bona taunimanima dekedai vada e nohomu.

Egu lalohadai be Ena Lauma Helağa na dekedekedai e nohomu, baine kahada helaoreana.

Egu lalohadai be Iesu Keriso e lalokau heniamu taudia na bese tamona.

Egu lalohadai be mase murinai Dirava Tamada dekenai mauri hanaihanai ai baita noho. Amen.



KAROA I.

Revareva Helaġa

Iseda Revareva Helaġa be dia buka tamona, a buka momo. Iboudiai na gunadia, a haida na guguna heherea. Unu buka haida na gori, haida taunimanimasigadia, haida taravatu, haida nihi bona peroveta, haida sisiba, haida parabole, haida ane. Unu idoidiai na buka badana tamonai e haboua, madi be idia ese Dirava itomahenidihona dalana bona ena ura ikaradia na e hadibala^{worship}idamu.

Ta tomamu Revareva Helaġa na Dirava ena hereva. Eda hereva na momomokakani. To baita lalotao ia na Dirava ena hereva taunimanimase e gwa^guraiva, bona imadiai e toreva. Nega haidai idia ese Dirava ena hereva asie kamonaiva bona asie toreva Dirava ena ura hegeregeredia. Sene neganai taunimanimalalodia do asie parara, bena Dirava na e ura baine hadibadia gaudia idoidiai na asie abidae diba ; bena Ia ese e hadibalaidia metairametaira.

Do baita lalotao danu Revareva Helaġa bukadia na dia Papua gadodiai bona dia Beretani gadodiai a idau gado idau gado ai e toreva, bona unu gado amo ai e tore hanaiva. Do baita diba danu unu buka e toreva negadiai na, taunimanimase buka ikaradia do asie diba harihari e karamu na heto, bona imadiai e tore hanai loulouva. Nega haidai itorehanaidia taudia na edia toretore nahuadia asie tohova, bena e tore kerereva. Buka gunadia na ede ela asi dibada ; vada e me boio vaitani. Unu amo e tore hanaiva bukadia haida na dekedai, heunūnu mo mimia.

Unu ġau iboudiai do baita lalotao Revareva Helaġa baita duahia negadiai. Ia ese ġau momo baine hadibada, bona tama duahia mai lalohadaida ida ia ese Dirava ena diari baine hahedinarai henida, to lalodai basitato ini hereva iboudiai ta ta Dirava ena amo vada ema.

Iseda Revareva Helaġa kahana be rua, Taravatu Gunana ma Taravatu Matamatana. Taravatu Gunanai taunimanima ese Dirava ede e laloa tomava, Iesu Keriso na do sema neganai, ta duahiamu. Edia lalohadai haida be kekerere vavaitani, a edia lalohadai kereredia iduahidia ese e durudamu. Taravatu Gunana danu Dirava na taunimanima e hadibadia metaira-metaira dalana na e hadibalaidamu. Ia ese lalo parara taudia uru idoidiai e abidia hidi bamodia bae hadibadia. Haida na Aberahamo, Samuela, bona peroveta haida. A taunimanima na e hahediba metairametaira, bena gabeai Dirava ese Natuna e siaia dekediai baine noho, bena Ena ura, ede bae noho toma urana na, baine hahedinarai henidia. Taunabunai, Taravatu Matamatana ta duahia louloumu, madi be lalonai eda Lohiabada Iesu Keriso sivaraina bona Ena hahediba ta davarimu.

A Iesu Sivaraina iduahinai do baita lalotao Dirava na e kara taunimanima ududia amo ai e herevava, bona imadia amo ai e toreva na heto. Iesu ena hereva ikamonaidia taudia ese anidia korikori nega momo asie diba ġoeva, bona Iesu Sivaraina gabeai e toreva taudia na Iesu ena hereva bona ġau kara asie lalotao namonamo nega idoinai. Una dainai Sivaraina idia ta ta ese e gwauraiva idau dala idau dalai.

Ġaudia bunu a hamaoromuimu, dia emui kamoni ihamaragina totona, a Revareva Helaġa iduahina dala namona ba diba. Asi buka ta tanobadai ia heġereġerena. A taunimanima haida edia kara kerere binai basita badinaia, hereva tamona binai ma hereva tamona bunai e abi hidimu, bena e tomu Dirava ena hereva momokani bae davari idia lalodiai. Do baita duahia mai lalohadaida ida, nega idoinai Dirava baita noinoi henia Ia ese baine kahada, bena baita lalo parara.

Harihari buka idauidau Revareva Helaġa lalonai ta davarimu na, aita helalolai.

Gori. Sivarai haida Taravatu Gunana matamamai be Iseraela taudia edia gori. Idia na tanobada ede e vara toma na asie diba, to lalodia eto, Dirava ese e karaia, bena idia na sivarai ta e gwauraia edia lalohadailaina, bena e hahedinaraia. Asi dibadia momokani, kara dika, hisihisi, bona mase tanobadai ede e vara toma, to lalodia eto, dia Dirava ena ura dainai, a taunimanimia edia kara kava bona gwaueede daidiai unu ġau vada e vara, bena gori ta e gwauraia. Hanua iboudiai ese sivaraidia asie gwaurai heġereġereva. Revareva Helaġa matamamai, Genese Bukanai, ita ese tanobada e havaraia dalana sivaraina rua baita duahi diba. Ta be Genese ai, Karoa 1 ela bona karoa 2, siri 3. Iharuana be karoa 2 lalonai, siri 4 ela bona 25. Unu sivarai ruaosi boma duahi boma diba idia na asie heġereġeremu lasi vaitani.

Genese bukanai gori dokodia bona taunimanimia sisigadia matamadia na asita diba ġoevamu, to una na herevana, madi be sivaraidia ta duahimu, idaunegai e mauriva taudia edia lalohadai baita diba.

Taunimanimia Sisigadia. Taravatu Gunana kahana bada ese Iseraela taudia sisigadia e hadibadamu, Namo ina sivarai baita duahia, to do baita lalotao Iseraela taudia Dirava korikori ilalohadailaina bona igwauraina na nega momo dia momomokakani, idia danu Ia ladanai asine ura ġaudia haida e karava. Nega haidai baita duahi Dirava ese Iseraela taudia e haduadia hanua ta ai tatau, hahine, memero, kekeni ibouboudiai bae aladia mase eto. Momokani idia banava eto, Dirava na unu e ura toma. To harihari vada dibada edia lalohadai na kekerere, madi be Iesu ese e hamaorodamu Dirava na dia unuheto.

Taravatu Matamatanai Iesu sivaraina hani ta davarimu. Sivaraina na sisidia idau, madi be idau tau idau tau ese e toredia, bona Iesu ena hereva mai ena ġau kara idau, madi be idau e lalotao. Edia sivarai itoredia badidia danu dia heheġereġere.

Taravatu Bukadia. Buka haida Taravatu Gunanai be Iseraela taudia edia Taravatu Bukadia. Unu na taunimanima ese asie duahi louloumu harihari, badina taravadia e atu dia ita eda, bona Iesu ese Taravatu matamatana bona namo hereana vada e me henida. Dibada danu Iesu ese aniani, inuinu, bona hehuri taravatu maragidia momo e badinava taudia na e badu henidia badava, madi be idia ese taravatu badadia, Dirava ilalokauhenina bona dekada taudia ilalokauhenidia taravatudia vada e laloboiova.

Nihi Bona Peroveta. Taravatu Gunana bukadia e toreva taudia haida ladadia be peroveta. Idia lalodia eto, Dirava ese gabeai bae vara ġaudia na e hahedinarai henidiava, bena idia ese edia hanua taudia e hamaorolaidiava. Ma haida na e nihiva, bena lalodia eto, Dirava ese edia nihi lalodiai bae vara ġaudia laulaudia e hahedinarai henidiava. Nihi bukadia ta be Daniela. Ma ta Taravatu Matamatana, ladana na Ihahedinaraina.

Unu nihi bona peroveta bukadia anidia idibadia na memetau ita eda hari. A ini na do baita lalotao, e toreva taudia na e tomava ġaudia do bae vara haraga. Bema vara momokani, idia na idaunegai e vara.

Sisiba. Peroveta taudia na gabeamo bae vara ġaudia mo asie herevalai. Idia ese edia uru taudia e sisiba henidiava, Dirava ena ura bae karaia, Ena dalai bae raka. Sisiba bukadia haida danu Taravatu Gunanai. Bada hereana be Heġereġere. Ina na buka aonega bada, taunimanima iboudiai bema duahia, bema namo. Taravatu Matamatana sisiba reva-revadia haida aposetolo ese e toreva, ekalesia gunadia taudia bae durulaidia, Keriso ena dalai bae raka.

Parable. Hahediba tauna ta bema ura hahediba metauna anina bema hamaorolaida, nega haidai sivarai ta bema gwauraia, bena unu amo laloda bema parara. Sivaraina na momokani e iava koikoi be herevana,

hahediba anina bema gwauraiā ġoeva. Sivarai unu-hetomadia ladadia be parabole. Iesu ese parabole momo e gwauraiā, unu na Taravatu Matamatanai baita duahi diba. A idaunegai Iesu do se varai, taunimanima ese parabolē e gwauraiā, parabole ma haida danu Taravatu Gunanai ta davarimu. Haida na kwakwadogi, ta Hahemaoro Taudia Bukanai, Karoa 9, siri 8 ela bona 15. Ma haida na lalata. Iobu bona Iona be parabole latadia, dia taunimanima korikori sivaraidia.

Iona bukana na e torea taunimanima baine hadibadia dika bema vara tau ta enai, ia na se varamu nega idoinai badina una tau mai ena kara dika, bena Dirava ese davana e heniamu, ena be Iseraela taudia edia lalohadai be unuheto. Ia danu e hadibadamu dika negadiai Dirava do baita abidadama henia, dia namo negadiai mo.

Iona bukana na e torea Iseraela taudia bae diba Dirava na tanobada idoinai Diravana, taunimanima iboudiai e lalokau henidiamu ; bae diba danu Dirava ena ura be idau taudia danu bae lalo parara, Ia ese lalodia e haparara heġereġerena, idia mo sibodia basie lalo parara.

Ane Bukadia. Taravatu Gunana bukana ta ladana be Salamo. Ia na Iseraela taudia edia Ane Bukana. Unu ane gadodia na vada e me boio, a tomadiho negadiai baita duahi loulou, una na baine namo, ena be asita abi diba, madi be lalodiai lalohadai namodia momo mimia.

KAROA II.

Sabati Dinana

Jew taudia, Kerisiano taudia, bona idau dalai Dirava e toma henia dihomu taudia edia lalohadai be tamona binai, dina ta hebedoma lalonai Dina Helaḡai bae halaoa. Taunimania iboudiai kahirakahira lalodia e tomu, namo hebedoma lalonai dina ta bae hahelaḡaia, bena una dinai

- (1) Dirava bae toma henia diho ;
- (2) Lauma ḡaudia bae lalohadailai (Lalodia bae hagoada) ;
- (3) Laḡadia bae ani (Taudia bae hagoada).

Jew taudia ese dina ihahituna e hahelaḡaia, madi be idia eto Dirava na laḡana e ani una dinai. Taunimania ma haida ese una dina e hahelaḡaiamu, madi be Jew taudia edia taravatu haida e badinamu. Una dina ladana Saturday ta tomamu.

Taunimania ma haida, dia Kerisiano taudia, e tomamu Friday be Dina Helaḡa.

Keriso ena dalai e raka tohomu taudia iboudiai kahirakahira e tomu Sunday be dina maorona.

Una dinai Iesu na mase amo vada e toreisi, bena una dina sibona dina helaḡa badanai e halaoa (Mareko 16, siri 2). Iesu ese Sunday e iava Saturday taravadia asine atu, a ena hahediba Petero bona Ioane bona bamodia danu Sunday e hahelaḡaia badina na Biagudia e lalokau henia badava, dibadia danu Ena toreisi lou be ḡau hereadaena tanobada enai vada e vara. Idia na e urava tanobada ese una dina basine laloaboio lasi vaitani, taunabunai idia ese e hahelaḡaia, ladana danu Lohiabada Dinana e nemaia.

Iesu ena hahediba ese gunaguna dina rua Saturday bona Sunday vada e hahelaḡa, madi be e haroro

henidiava taudia hutuma bada be Jew taudia, Saturday ai dubu e laova. Hahediba danu e laova, taunabunai mai edia dala Iesu sivaraina momokanina unu taunimanim bae hadibalaidia. A Iesu e abidadama heniava taudia na e hahutumadia neganai na, Jew taudia edia Sabati, Saturday bunai, e rakatania.

Kerisiano Ekalesia badadia be laḡani daha ta sinahu taurahanita ini e kara tomamu, Iesu ena hahediba heḡereḡeredia, Lohiabada Dinana na Dina Helaḡanai vada e halaoamu.

Una dina vada e hahelaḡaiamu, to Kerisiano taudia na Dirava bema laloa une, bona Ena dalai bema raka toho dina idoidiai, una na bema namo, madi be dina idoidiai na Iena.

KAROA III.

Bapatiso

Ioane Bapatiso ese taunimanima e hadibadiava edia kara dikadia bae helalolai kerehai, bena Dirava ena dalai bae raka. Idia na unu e kara tomava toana be bapatiso. Hehuri ranuna ese tau anidia mirodia bema huriaoho na heto, helalo kerehai bona Dirava iabidadamahenina ese lalodia mirodia bema huriaoho. (Mareko Karoa 1, siri 4.)

Iesu e bapatisoa taunimanima iboudiai baine hamaorodia Ia danu Dirava e abidadama heniava bona Ena dalai e rakava. (Mareko Karoa 1, siri 9.)

Iesu na Ena memero dekediai e nohova neganai na idia ese taunimanima e habapatisodiava, Ioane ese e habapatisodiava hegeregerena. Iesu e hasatauroa murinai, Ena memero na dounu taunimanima e habapatisodiava, to e habapatisodiava Ia ladanai.

Karadia 8, 9 ; 9, 18 ; 10, 47 ; 16, 15-33 ; 18, 8. Taunimanima haida lalodia e tomu bapatiso dalana maorona be tau anida idoinai bae haigoa diho ranu lalonai. Hehuri ranuna ese tau anida mirona baine huriaoho, to laloda mirona basine huriaoho. Iesu iabidadamahenina ese mo ġau dikadia laloda amo baine abioho, baine duruda Ena dalai baita raka. Una na Kerisiano tau gunadia e dibava. Idia danu e dibava bapatiso na toa mo. Sibodia na Keriso e henia bona Ia toana idia tubuadiai e atoakau, idia ese ġau dikadia vada e rakatani bona Keriso ena dalai e raka tohova na bae hahedinarai.

Keriso toana tubuadiai e atoakau taudia lalodia eto natudia danu Ia toana bae abia, una na baine maoro, madi be dibadia Iesu ena ura be memero kekeni ibouboudiai Ienai bae halaodia. (Mat. 19, 13-15.)

Iesu ena memero ese dia nega idoinai bapatiso na dala tamonai asie karaiava, harihari danu taunimanima

ese e karaiamu, to dia dala tamonai mo, madi be dalana na herevana. Bapatiso na dia mea. Ranu ese tau ta lalona basine hanamoa diba. A Lauma Helağa be taunimanima ta lalonai baine vareai neganai, ia ese Iesu baine abidadama henia, baine ura danu ena kara dikadia baine rakatani.

Bapatiso na helağa bada, taunabunai basie bapatisodia ela bona kara dikadia ihelalonededia bona Iesu Keriso ena Dala irakalaina uradia baita ura.

Taravatu Gunana neganai dubu biagudia ese taunimanima e hadibadiava tau ta Dubu irakavareaina bema ura, haheğoeva helağana baine henia guna. Ioane Bapatiso na e hahedibava eto, taunimanima ta bema ura Dirava ena Basileiai bema raka vareai, do baine habapatisoa guna.

Iesu ena memero na e hahedibava eto, eda mauri dikana baita rakatania bona Keriso toana tubuadai bae atoakau, ita ese Mauri Dalanai baita raka vareai.

KAROA IV.

Iesu Keriso Maina iharuana

Ina hereva "Maina iharuana" na dia maoro. Iesu Keriso na "Maina iharuana" asine gwauraia lasi waitani, a baine lou mai eto. Ia na vada e lou mai waitani.

Keriso na "guba oridia latadiai bainema" herevana na laulau na heto. "Ori" anidia be taunimania ihagugudia bona iharaivadia; taunabunai Keriso na e gwau hamata eto, haheraiva negadia bae varai, Ia na baine lou mai mai siahuna ida, Ia siahuna na gunana baine hereaia, taunimania edia gorere ihanamodia bona edia mauri hanaihanai ihavarana totona.

Keriso na e gwau hamata eto, Ia na do baine lou mai uru gunana neganai, e itaiva bona Ia ida e nohova turana na do e mauriva. Ia na vada ema e iava ena gwauhamata na asine hamomokania ani?

Keriso na vada ema momokani, to dia turana edia helaro hegeregerena. Mase amo e toreisi lou, bona Ena hahediba bona haida danu e hahedinarai henidia neganai, Ia na vada e lou mai. Ia danu ma e lou mai mai siahu badana ida Penetekoso dinanai. Una neganai aposetolo na e diba waitani Ia na vada e maurimu bona mai siahuna ida, bona edia mauri idoinai e haidaua. Idia na asie noho hehuniva, a Sivarai Namona e harorolaia hedinarai, taunimania garidia asie gariva, a lohiadia bona pava-pavadia vairadiai e herevava, e iava dibura ruma bona mase e vaira henidiava, mai boga aukadia ida.

Ia danu Hahemaoro ai vada ema Ierusalema ibuatarina neganai. A Ia na dia hahemaoro, a hahenamo totona vada ema. Una neganai Ia ibadinana taudia, Jew taudia ida, edia tano ai bona idau tano idau tano ai e hakarohodia rohorohova, bona Iena Mauri bona Satauro Sivaraina e ha pua rohorohova. Unuhe-

tomana Keriso na tanobadai vada e lou mai mai siahuna matamatana bona hereana ida.

TO KERISO NA DIA TAU ANINAI ASINE LOU MAI ; IA NA LAUMANAI VADA E LOU MAI.

Aposetolo taudia bona Kerisiano tau gunadia na e helarova Keriso na anitaranai baine lou mai eto, ori latadi ai baine guikau, Ena Basileia ihaginina totona. A Keriso na hereva hegeregere (laulau na heto) e gwaurai, peroveta gunadia ese Lohiabada Dinana e gwauraiava na heto. Paulo danu ena lalohadai be kerere Tesalonia taudia e tore henidia guna neganai (1 Tes. Karoa 4, siri 16-17). Una neganai Paulo banava eto Keriso na anitaranai baine lou mai. Una hahediba dainai Tesalonia ai e nohova Kerisiano taudia haida na lahedo e matamaia, asie gau karava, eda Lohiabada ena lou mai e nariava. Edia lahedo ese dika e havaraiava, bena Paulo ese revareva ta ma e toreava, baine hamaorodia do bae ha gau kara, badina tau ta be Keriso ena lou mai asi dibana, ena be Ia na do bainema. Ena revareva gabediai Paulo ese Keriso ena lou mai herevadia diahoho e toreva.

Benaini, momokani Paulo bona Aposetolo taudia iboudiai na e helarova Keriso na tau aninai baine lou mai, Basileia inaihenina taudia baine hahemaoro henidia, siahuna bona hairaina baine hahedinarai. To idia lalodia eto, Lohiabada ena gwau hamata binai, Ia na edia uru neganai na do baine lou mai, idia haida na do e mauriva neganai. "Ina uru na do basine ore ela bona unu gau iboudiai bae vara vaitani." (Mat. 24, 34 ; Mareko 13, 30 ; Luka 21, 32.)

Momokani lalodia asieto, Iesu ena hereva anidia bini, lagani daha rua baela bubuni, bena Ia na baine lou mai. Taunabunai, Ena gwau hamatai Ia ese dia ita eda nega, a Kerisiano tau gunadia negadia e hehalolaiva. "Maina iharuana" na dia gabeai, madi be vada e lao bubuni.

Unu amo ita dibada Mataio Karoa 24 lalonai Keriso ese Ierusalema ibuatara e herevalaia, ena be Ia ena hereva ikamona dia taudia na anidia asi dibadia, e gwaurai neganai. Benaini, una negana ema bona hari haida ese una karoa na koboni ai vada e me halaoa, taunimanima bae hagarilaidia. A Iesu na dia hahegari tauna lasi vaitani.

Ioane ena Evanelia e torea negana be daudau herea Mataio, Mareko, Luka muridiai, Revareva muridiai, bona Ihahedinaraina Bukana danu murinai—Keriso na e mase bona e toreisi lou murinai, laḡani 60 e lao bubuni, bena e torea. Ioane ena Evanelia na dia Evanelia toiosi bona Revareva bona Ihahedinaraina heḡereḡeredia. Ioane na asineto, Keriso na e gwau hamata eto, ori latadiai baine lou mai, ibadinana taudia ida baine hedavari guba padanai. Ioane lalona eto Ena gwau hamata na Ena Lauma Helaḡa baine siaia—Ioane Karoa 14, siri 16-21 ba duahi. “Ihahedinaraina” na siri 21 lalonai Lauma Helaḡa baine heni, dia tau aninai.

Ioane Karoa 16, siri 7-15 danu ba duahi. Unu siri lalodiai Keriso na e gwau hamata eto, Lauma Helaḡa maina anina be kara dika taudia baine hahemaoro henidia, bona Ia hairaina baine hahedinarai. Lauma Helaḡa na haheraiva negadiai tau ihalodiai bainela, bona nega idoidiai danu Hereva Momokani Laumana bona Hahekau Taunai bainela.

Ioane na e dibava Keriso na dia tau aninai Kerisiano tau gunadia dekedia asinema, a Laumai vada ema, madi be e dibava iena mauri neganai bona taunimanima sinahu haida dekediai unu ema toma.

Nega idoidiai taunimanima haida ekalesia lalonai lalodia e tomu Keriso na do se lou mai, bena e helaromu Ia na baine lou mai edia negai. Lalodia unu e hadai tomamu taudia na, edana dina Ia na baine lou mai na, e tahua tohomu, a nega idoinai edia lalohadai na kekerere.

Ita eda negai dina momo vada e gwaurai hamata. Haida bini ; ta Desema 4, lagani 1917. Una dina na vada e ginidae, to eda Lohiabada na asinema. Idia ma eto, Novema 11, 1929 daba matanai vada bainema, to Keriso na una dinai danu asinema. Gabeai ma eto, Armageddon tuarina (Ihahedinaraina karoa 16) baine vara laḡani 1934 lalonai, to umui danu dibamui edia hereva na dia mamaoro.

Ita ese Revareva Helaḡa basita helalolaia kerere. Hereva haida ia lalonai be idaunegai e mauriva taudia sibodia edia, a hereva momomokakani badadia na nega idoidiai ḡaudia, taunabunai ita danu eda. Unu hereva momokanidia na do baita tahu, baita badina.

Ena be taunimanimia diaḡau lalodia e tomu Ihahedinaraina Bukana e torea Keriso ena lou mai igwauraina totona, to ia na vada e torea Lohiabada ena laḡani sinahu ginigunanai e mauriva taudia edia. Kerisiano taudia Roma Ḡaubadadia ese e hadikadiava, bena buka na e torea baine durudia bae goada, Keriso bae kamoni henia, ena be bae kamoni henia dainai, bae aladia mase. Tuari bona hahedika idoidiai bona Aneti-Keriso (Roma Ḡaubadana bunai) unu nega ḡaudia, bena vada e lao bubuni. Una buka ese tuari, haheraiva, bona hahedika ita eda negai asine gwauraimu. Benaini, hekaha bona hahenamo herevadia momomokakani badadia bona ta hoalaimu gwau hamatadia na ia lalonai mimia ; idia na harihari momomokakani ita eda, laḡani sinahu ginigunanai e mauriva Kerisiano taudia edia e momokaniva heḡereḡerena. Nega idoidiai hereva momomokakani badadia unu sivarai lalodiai baita tahu, bena bae hagoadada momokani.

Niu ta a laloa. Anina bona ranuna ia lalonai mimia, to asita davari haragamu. Idia na koukou lalonai, koukouna danu mai bununa. Bununa do baita dariaoho, koukouna danu baita huaria, bena anina baita davaria.

Revareva Helaḡa ena hahediba momo na unuheheto. Idia edia e torevā negadia bona sivaraidia danu bunu bona koukou na heheto, baita darioho, bona baita huari, bena hereva momokanidia baita davari; idia na taunimanima iboudai eda.

Maina Iharuana ihadibalaina na unuheto. Ia na Keriso ida e nohova taudia edia, idia na doini tanobadai e mauriva negana e gwauraiava, baine hadibadia Biagudia ese se rakatanidia, a Laumai doini dekediai e nohova mai siahuna badana ida, siahuna na, tau aninai e nohova negana siahuna na e hereaia. Ia danu ita eda, madi be Keriso na Laumai e noho hanaihanaimu, e lalokau heniamu bona e ḡavaia tohomu taudia dekediai. Ena hekakai ta dabumu negadia idoidiai Ia na vada e lou maimu, eda mase neganai danu ma baine lou mai, baine hakauda lao, Ia ida baita noho Ena gabu ai. (Ioane karoa 14, siri 3.)

Ena be ina tanobada na do baine puki, to Keriso ena Basileia na mia hanaihanai Basileiana. “Ba gima, kamonai ai ba gini tutukatutuka, goada taudiai baola, ba goada balaheni. Emui ḡau kara idoidiai lalokau ai ba kara.” (1 Cor. 16, 13-14.)

KAROA V.

Mase bona Murinai bae Vara Ġaudia

(i) Mase bona Mauri Gabena ihadibalaidia Taravatu Gunana Bukanai.

Taravatu Gunana neganai taunimanimadia ese mauri mase murinai asie laloa badava. Taravatu Gunana ena helaġa bada taudia lalodia eto, Dirava ena ura ikarana tanobadai bona Dirava ena hekaha bona hetura iabidia na ġau nanamo heherea mauri ai. Lalodia danu eto, Dirava isiaina bae lao heni mai goadadia idoinai ida, Ia ese edia mauri tanobadai baine halataia, a kara dika taudia na "mauri taudia edia tano amo" baine abidiaoho.

Mase murinai bae vara ġaudia na e lalohadailai negadai, idia eto, taġa bona oġoġami, pavapava, lohia, bona taunimanima iboudiai, namodia bona dikadia, gabu tamona baela ladana e hatoa "Sheol" (Misi Lao ese "Sheol" asine torea a "Hade," badina be Heleni taudia ese gabuna unu e hatoa tomava).

Sheol, mase taudia edia noho gabuna na, idia eto, **tanobada henunai** (Hege. 15, 24 ; Sal. 63, 9 ; 86, 13) ; **asi regeregena gabuna** (Sal. 94, 17 ; 115, 17) ; **mai vaburana** (Sal. 143, 3 ; Iobu 17, 13) ; **mai kahuna** (Isa. 26, 19) ; **Dirava ena hoa karadia asie hedina-raimu unuseni ai** (Sal. 88, 10-12) ; **e noholaiamu taudia na e mahuta hedavauhemu** (Iobu 14, 12).

Idia na eto, mase taudia iboudiai na unuseni ai mai edia mauri, to una mauri na dia mauri korikori. Idia iboudiai "laulau" mo, turadia tanobadai bona Dirava danu asi dibadia. Asi goadadia, ġau ta asie laloataomu, asie dibamu. Ini siri ba duahi ; Eccles. 9, 5-6 bona 10 ; Sal. 6, 5 ; 30, 9 ; Isa. 38, 18. Idoidiai ese mauri Sheol lalonai e gwauraiamu.

Taunabunai, Heberu taudia na asie urava bae mase, bena una gabu dikana, Dirava ihanamona basie

diba gabuna na, baela. Hesehia sivaraina Isaia karoa 38 lalonai ba duahia. Hesehia na Dirava ena helaġa tauna ta. E gorerea, bena e tai, badina ia na mase asine ura henia. Bena ia ese Dirava e ġuria ena mauri laġanidia ma haida tanobadai baine henia, bena baine imodaia bona baine toma henia diho, madi be lalona eto, ia na Dirava basine dibaia, basine itaia Sheol lalonai.

Gunaguna Heberu taudia iboudiai edia ura be tamona mo binai, edia bese baine mauri hanaihanai. Idia ese edia bese, dia taudia, e gwauraia loulouva. A Ieremia lalona e hapararaia bada, bena e hahedibava taunimania ta ta ena dika ena dika davadia do bae abi. Unuhetomana taunimania ta ta edia kara nahuadia itohodia ilalohadailaina na e vara matamaia.

Iseraela taudia na idau tano ai e hanohodiava neganai, asi edia hanua korikori ġaudia bona kohudia dekediai mimia, bena idia ese hekaha bona tau halo ġuriġuri ai, bona Dirava na badibadidiai e nohomu ilalohadailaina na, e tahuva. Idia ese lalohadai matamatadia bini e hadibava, Dirava na tano iboudiai e noho henimu, baine durudia diba nega idoidiai, gabu idoidiai danu. Gabeai lalodia e hadai matama eto, Dirava ese asine hahisidiava edia kara dika davadia ihenidia totona, a edia hisiani davadia baine henidia, Ia ese Ena Mesia Ena Basileia Ierusalemia ihadaina totona baine siaia neganai.

Ini hereva bona unu hereva Taravatu Gunana kahana idoidiai ese e hamaorodamu, nega momo tau namodia e urava Dirava ida mase murinai bae mauri Basileia Badana bae itaia.

Isaia Karoa 26, siri 19 lalonai peroveta tauna eto, Iseraela mase taudia "bae toreisi lou" Mesia ena Basileia itana bona imoalelaina totodia; Daniela Bukanai danu (ia na vada e torea dia laġani sinahu rua ema bona Keriso ena vara laġanina) itorena tauna eto, namo bona dika taudia bae toreisi lou hahemaoro

totona ; tau namodia ese mauri hanaihanai bae abia, a tau dikadia ese hemarai hanaihanai bae abia.

To Isaia bona Daniela danu lalodia asieto bese iboudiai do bae toreisi lou. Raruosi ese Iseraela taudia mo e gwauraidiava, asi edia helaro herevadia ita eda.

Mauri mase murinai helarona herevana nanamo hereadia baita davari buka ta lalonai, ladana be "Aonega," e torea laġani 150 sisivana Keriso na tanobada do semai, to una buka na dia ita eda Revareva Helaġa lalonai. E torea Taravatu Gunana negana bona Taravatu Matamata negana ihuadiai, ia danu buka ta lalonai, ladana be "Apocrypha" (anina be "gabei e torea"). Itorena tauna ini e gwau toma, "A kara maoro taudia laumadia be Dirava imanai, bona hahehisi ta idia dekediai basine kau. Ena be taunimanimā vairadiai dika bae davari, to mauri hanaihanai mo e laroamu. Ia bae abidadama henia taudia ese hereva momokani do bae diba ; mai iurahenina ida bae kamoni henia taudia ese Ia lalonai bae noho."

Taunabunai Taravatu Gunana negana e doko murinai bona Taravatu Matamatana negana do se ginidae ai, Iseraela taudia na Toreisi Lou bona Mauri ta mase murinai herevadia iabidaedia e hadibava, ena be lalodia asieto taunimanimā iboudiai na do bae mauri lou.

Una neganai danu, Sheol ilalohadailaina e haidaua, madi be taunimanimā ese Hahemaoro e laloa bada matama. Idia eto, Sheol na gabuna mase taudia iboudiai baela, unuseni ai Hahemaoro Dinana do bae naria. Hahemaoro neganai namo taudia Paradaiso baela, dika taudia Gehenna baela.

"Sheol na henari gabuna." Una lalohadai amo Pope taudia ese gabu ta ladana "Purgatory" e gwauraiamu, e tomu mase taudia na unu baela, to Revareva Helaġa lalonai asi hahediba unuheto, bona Iesu Keriso ese asine gwauraia lasi vaitani.

(ii) Mase bona mase murinai herevadia Taravatu Matamata lalonai.

Keriso na tanobada vada ema neganai, Parisea taudia bona Itorena taudia e lalohadaiva bona e hahedibava eto, mase taudia na do bae toreisi lou, a Sadukea taudia eto, mase taudia na basie mauri lou.

Iesu Keriso ese mauri mase murinai herevana momo asine hamaorolaidamu, to mai ġauna e tomu. “Tamagu ena ruma mai ena noho gabudia diaġau. Unu basinema heto, bama hamaoromui, badina be bainala, gabu ta baina abia heġaeġae umui emui. (Ioane 14, 2.)

Keriso na e hahedibamu, Ia bae abiadae taudia iboudiai bona kara namodia bona ġoevadia bae kara toho Ia na e karava na heto, basie mase, a mauri hanaihanai bae abia. “Toreisi lou be Lau; mauri danu Lau” (Ioane 11, 25-26). Keriso vairanai mase na mauri namona iduarana—una mauri na harihari ta matamaiamu, dia Dina Gabena ena Toreisi Lou ai.

Biaguda ese mauri mase murinai herevana e hahedibalai momokanimu. Ena hahediba bunai baita davarja Ena haere ai, Ia ese Sadukea taudia e haere henidia, una mauri e nanadailaia neganai. Mataio 22, 29-34 bona Luka 20, 34-38 ba duahi. “Dirava na dia mase taudia edia Dirava, a mauri taudia edia”; taunabunai, Aberahamo, Isako, Iakobo na asie mase, toreisi lou asie nariam, idia na mamauri, Dirava vairanai nonoho.

Iesu Vairana Ihaidauna sivaraina ese e hamaorodamu (Mat. 17, 1-3) Mose bona Elia na e diho Iesu ida e herevaherevava. Taunabunai, raruosi na asie mase, e mauri momokanimu. Unuhetomana Iesu iabiabiraina taudia iboudiai na do bae mauri.

Keriso ese mauri mase murinai ede baine heto na sisina mo e gwaauraiamu, a una mauri, ede baita davarja toma na, e gwauraia badamu.

Mai ena kohu momo Lohiabadana sivaraina ba duahia (Lk. 18, 18-22 ; Mat. 19, 16-22 ; Mk. 10, 17-22). Una sivarai ese e hamaorodamu Biaguda ena hahediba binai, mauri hanaihanai iabina baita ura, eda kara tanobadai nahuadia baita toho, bona una mauri baita tahua goadagoda.

Luka karoa 20, siri 34-35 lalodiai ini hereva ta davarimu, " Namodia bae gwaurai bena una negana bae abia bona bae toreisi lou taudia."

Ioane na Karoa 3, siri 16 lalonai eto, Keriso iabidadamaheninai mauri baita abia. " Bae abidadama henia taudia iboudiai na basie mase, a mauri hanaihanai bae abia." Ona karoa 3, siri 36 lalonai eto, " Natuna iabiabiraina tauna na mai ena mauri hanaihanai " (anina be iabiabiraina tauna na mai ena mauri harihari, bona una mauri ienai baine mia mase neganai, gabeai danu). Karoa 5, siri 24 dorinai eto, Keriso erena e kamonaianu taudia ese mase vada e rakatania, mauri ai e me kau." Taunabunai, dibada ita eda Lohiabada ese gabu ta Sheol e iava Purgatory na heto asine gwauraia, a bae ġavaia momokani taudia na edia mase neganai Tamada ena noho gabudiai bae raka vareai eto.

Eda Lohiabada ena parabole bona hereva ma haida ese e hamaorodamu taunimanima ese mauri mase murinai bae abia e iava basie abia edia kara bona kamoni daidiai. Ini parabole ba duahi—Korukoru ta asi anina (Lk. 13, 6-9) ; Sitona nadinadidia bona Ava nadinadidia (Mat. 13, 24-30) ; Ruma papapapa latanai e hadaia (Mat. 7, 24-27). Iesu ena hereva danu Mat. 7, 21 lalonai ba duahia.

Reana Biaguda ese mauri mase murinai ede baine heto na asine hamaorolaidamu, madi be laloda na duduhu. Ia ese Nikodemo e nanadaia eto, " Lau ese tanobada ġaudia baina herevalai henimui to basio abidae, O guba ġaudia baina herevalai henimui, ede bavabidae toma ? " (Ioane 3, 12).

Paulo danu e hahedibava eto Keriso ikamonai-henina be mauri iabina dalana. " Kara dika ena

hesiai tauna davana na mase, a Dirava ena harihari ġauna na mauri hanaihanai, Keriso Iesu eda Lohiabada bagunai ” (Rom. 6, 23).

Ioane ena Revareva Ginigunana ese Taravatu Gunana taudia edia helaro bona Taravatu Matamata Bukana ena hahediba anidia ini e gwaurai hedinarai tomamu, “ A Dirava ena ura ikarana tauna na baine noho hanaihanai.” (1 Ioane 2, 17.)

Taunabunai, Taravatu Matamata Bukana ese e hadibadamu Keriso bona Dirava ikamonaihenidia taudia ese mo mauri hanaihanai bae abia. Una hahediba dainai ai ese a noinoi henimuimu, emui kamonai nahuana ba tohoa, bena emui goada heġereġerena idau taudia Mauri Dalana Korikori ai ba hakaudia.

KAROA VI.

Hahemaoro

(i) Ihadibalaina Taravatu Gunana Bukanai.

Taravatu Gunana Bukana kahana momo bada lalodiai Hahemaoro herevadia ta davarimu, ena be gunaguna bona gabu momo lalodiai taunimanima edia lalohadai eto una hahemaoro tanobada latanai baine karaia, dia mase murinai.

Peroveta taudia ese Hahemaoro Dinana ta e gwaauraiava. Ladana momo e gwaauraiava ; haida bini, " Lohiabada Dinana " (Joel 1, 15) ; " Ena badu dinana " (Zeph. 1, 15) ; " Dina badana mai garina ida " (Mal. 4, 5) ; " Dibura bona daradoko dinana " (Joel 2, 2) ; " Dibura dinana, dia diari dinana " (Amos 5, 18).

Ia na Hahemaoro Dinanai Iseraela taudia edia bainela, bona Hebuatari Dinanai Idau taudia edia. Hahemaoro murinai Dirava ese Ena Basileia baine hadaia. Inai taudia ese Iseraela e hadareredia negadiai na, peroveta taudia ese inaidia na edia darere vairadiai e itaia na heto, bae darere negana na " Lohiabada Dinana " e hanemailaia ; to, ena be adia inai besedia haida ma haida e hadareredia, " Lohiabada Dinana " na dounu. Tanobada latanai unu bese iboudiai e hahemaoro henidiaia. Idia na e darereva badina idia na Dirava inaina—peroveta taudia na unu e gwau tomava.

Salamo Bukanai danu Hahemaoro dinana herevadia haida ta davarimu. To ia na hahemaoro tanobada latanai, dia mase murinai. Nega hoho Salamo taudia eto Iehova na bainema tanobada baine hahemaoro henia—" tanobada baine hahemaoro henia mai kara maoromaorona ida, hanua taudia danu mai momokanina ida." (Sal. 96, 13 ; 98, 9). Benaini, una hahemaoro na tanobadai baine karaia. Readia Salamo ta lalonai hahemaoro mase murinai herevana basita davarua.

Ecclesiastes Karoa 11, siri 9 lalonai haroro tauna ese eregabe taudia e rauadia bona una siri dorinai eto, "To ba diba unu ġau iboudiai daidiai Dirava ese do baine hahemaoro henimu." Unu hereva na e toreva tauna ena lalohadai be taunimanima ta ta sibodia baine hahemaoro henidia. Unuhetomana Karoa 12, siri 14 lalonai eto, "Madi be Dirava ese ġau kara iboudiai baine hahemaoro henidia, hehuni ġaudia idoidiai ida, nanamo e iava didika."

Taunimanima baine hahemaoro henidia Dina Gabenai ilalohadailaina ese bese iboudiai tanobada latanai baine hahemaoro henidia ilalohadailaina e boloa metairametaira. Bena Daniela Bukanai e hamaorodamu **hahemaoro mase murinai mai ġauna**, bena taunimanima edia kara davadia do baine henidia—mauri hanaihanai namo taudia ese bae abia, a hemarai hanaihanai dika taudia ese bae abia. Daniela Karoa 12, siri 2-3 ba duahi.

A ba lalotao, Daniela Bukana ese Iseraela taudia mo sibodia e gwauraidiamu, e hahedibamu Iseraela taudia ese mauri mase murinai bae abia, bona Dirava ese baine hahemaoro henidia.

Hereva diahoho ai Hahemaoro anina Taravatu Gunana Bukanai aita gwauraia.

1. Anina na Dirava Ena Basileia ese idau bese idoidiai baine hadareredia.
2. Dirava sibona na Hahemaoro Taunai bainela.
3. Tanobada latanai baine hahemaoro.
4. Una hahemaoro ilalohadailaina e habadaia ema bona e hahedibava eto Iseraela taudia baine hahemaoro henidia haġauhaġau.
5. Taravatu Gunana Bukana kahana momo badai una hahemaoro na ina mauri ai baine karaia eto, to gabeai Daniela Bukanai mase murinai hahemaoronai vada e halaoa.

6. Benaini, Iseraela taudia mo baine hahemaoro henidia, bona sibodia edia kara davadia baine henidia.
7. Taravatu Gunana Bukana ese asine hahedibamu ita iboudai ese mauri mase murinai baita abia, asine hahedibamu danu mase murinai ita iboudai baine hahemaoro henida.

Una na basita hoalaia, laloda danu basie hisihisi ia dainai. Revareva Helağa be buka momo ihaboudia. Idia na e hamaorodamu Dirava ese taunimanim lalodia e hadiariva bona e hapararava, e hadibadia bona e hakaudia metairametairava, Ia bona Ena kara iboudiai bae diba, ema bona tanobada ese Dirava Natuna Korikori maina e naria heğaęęaeva, diari bona lalo parara ihağugurudia.

Idia ese Dirava ihadibana e habadaiaiva heğereğeren edia mauri ihağoevadia e habadava ; bona edia mauri ihağoevadia e habadava heğereğeren, edia helaro e habadaiaiva, edia mauri tanobadai bona Dirava ibamona mase murinai helarona bunai.

(ii) Taravatu Gunana Bukana murinai.

Idau bukadia e toreva Taravatu Gunana Bukana murinai ; diağau lalodiai Hahemaoro herevadia baita davari. Hahemaoro ilalohadailaina idia lalodiai e habadaia ema bona dia idau bese sibodia, dia Iseraela taudia mo, a taunimanim iboudiai baine hahemaoro henidia eto. Mesia na Hahemaoro Taunai bainela. Hahemaoro na Mesia ese baine pavapava matama neganai na baine karaia. Buka ma haida eto, Mesia na basine pavapava hanaihanai. Unu buka na eto, Hahemaoro na baine karaia Iena pavapava dokonai.

Ba lalotao, idau nihi bukadia amo unu buka heğereğeredia Keriso na lağani daha tamona mo baine pavapava ilalohadailaina na e vara. Taravatu Gunana Bukana asineto Mesia ena pavapava mai dokona. Keriso danu unu se gwau toma. Ekalesia tau gunadia

danu unu hereva asie abidaeva. Ekalesia Gunanai taunimanima haida ese Keriso na laḡani daha tamona mo baine pavapava herevana na e gwaurai matamai na, Kerisiano tau gunadia eto edia hereva na kekerere vavaitani, bena edia lalohadai herevadi ai ini hereva e toreva, “Ena Basileia na asi dokona.” Taunabunai, dibamui Keriso na laḡani daha ta baine pavapava herevana na kekerere vavaitani. Ena pavapava vada e matamaia vaitani, bona Tamada ida baine pavapava ela bona hanaihanai.

(iii) Iesu Keriso ena hahediba.

Iesu Keriso na e hahediba momokaniva eto, Hahemaoro na do baine karaia, bona Ia sibona ese “mauri taudia bona mase taudia” do baine hahemaoro henidia.

Keriso ese taunimanima baine hahemaoro henidia haḡauhaḡau—Headava Anibouna parabolena ba itaia (Mat. 22, 1-14)—bona “taunimanima ta ta edia kara heḡereḡeredia davadia” do baine henidia (Mat. 16, 17), edia goada bona lalo parara e ḡaukaralaiva heḡereḡerena baine hahemaoro henidia; taleni bona rami hebou ulatodia paraboledia unu e gwau tomamu (Mat. 25, 1-13).

Ioane Karoa 3, siri 17 bona 18 lalodiai e hamaorodamu Keriso na eto dia tanobada ihahemaorohenina, a ihamaurina vada ema; bona Keriso asine abidadama heniamu tauna ese sibona unu amo e hahemaoro henimu. Dia Keriso ese asine hahemaoromu, a taunimanima ta ta sibodia ese e hahemaoro henimu. Ioane Karoa 12, siri 48 lalonai Ia danu e tomu, “E dadarai-gumu bona egu hereva se abidaemu tauna na mai ena hahemaoro; na gwauraiva herevadia ese bae hahemaoro henia dina gabenai.”

Benaini, Keriso ena lalohadai eto taunimanima iboudiai Dina Gabenai do baine hahemaoro henidia, ita iboudai ta ta danu baine nanadaida, bena ena kara ena kara Dirava vairanai baita hahedinarai.

KAROA VII.

Iesu Keriso be Mauri Dalana

Mareko 1, 1-3. Peroveta taudia bona Ioane Bapatiso ese taunimanima e hamaorodiava Pavapava ta bainema, edia Hahekau Taunai bainela. To negana Iesu ese taunimanima e hamaorodia Ia na Keriso Hahekau Tauna, idia ese Ena hereva asie abiadaeva, madi be idia banava eto Hahekau Tauna ese ena tuari memerodia hutuma baine abidia. Idia na Dirava ena dala asi dibadia.

Taunimanima iboudiai kahirakahira lalodia e tomu mai edia Dirava ta, to diaġau ese Herevana kereredia e abidaemu, Ia na daika bona ena Dala be edana asi dibadia.

Iesu na vada ema una Dala bona Dirava herevana momokanidia taunimanima baine hadibalaidia. Ia na eto, "Vada e me itagu tauna ese Tamada danu e me itaia." Ia na e urava taunimanima bae diba Ena dala bona Dirava ena dala be tamona mo. Tau ta ese Dirava se itaia lasi vaitani, to Iesu ese taunimanima e hadibalaidiava ġaudia daidiai, idia ese Ena dalai bema raka, Ia bema davaria diba.

Tau ta dia namo ia ese Dirava baine abiadae dainai, a baine namo Iesu ese e hamaorolaida baita kara ġaudia na baine kara dainai. Iesu na e tomu dia Dirava iabidaena taudia iboudiai, a Ena Dalai bae raka taudia na bae mauri. (Mat. 25, 31-46.)

Iesu na e gwauhamata eto Lau bae abigudae bona na hadibalaidia Dalanai bae raka taudia na mauri hanaihanai bae abia (Ioane 8, 51).

Ta dibamu Dirava ese taunimanima e lalokau henidiamu, badina be Ia ese Iesu Keriso e siaia Ia herevana momokanidia bona bae badina karadia bini baine hadibalaidia, bae hebogahisi, idau taudia bae durudia, bae hadikadia taudia edia dika bae helalolai

nege. Iesu na unu e kara tomava. Taunimانيا na asie urava una dalai bae raka, madi be ia na dia haraga ; bona negana Iesu ese e hamaorodia Dirava ena dalai asie rakamu, idia na e baduva, bena e alaia mase.

To idia ese tau anina mo ialana mai dibadia. Ia Laumana na vada e lou mai, bona e mauri hanai-hanaimu, baine duruda, bena dala korikori ai baita raka.

Taunimانيا iboudiai na una dalai bae raka diba, badina be ia na dia aonega bona taġa taudia sibodia edia, a Iesu e abiadaemu bona Ia na e hadibalaidiava karadia na e kara tohomu taudia danu edia.

Ia na Dirava deken a laomu Dalana ; Ia ese Dirava herevana momokanidia e hadibalaidamu ; bona Ia ese mauri hanaihanai e henidamu. (Ioane 14, 6.)

KAROA VIII.

Henanadai

1. Dirava be daika ?
Dirava na Lauma Badana, mauri ihavarana.
2. Edananegai Dirava na vada e vara ?
Ia na vada se vara ; Ena mauri be asi matamana bona asi dokona.
3. Dirava na edeseni ai e nohomu ?
Laumana na gabu idoidiai vada e noho henimu.
4. Dirava ena kara be ede heheto ?
Ena kara nega idoinai nanamo, kara dikadia vada e inai henimu. Taunimanima edia kara bona lalo hadai na dibana. Ia danu vada e momokani hanaihanaimu.
5. Tanobada bona lalonai ta itamu gaudia iboudiai be ede amo ema ?
Tanobada bona gau iboudiai danu Dirava ena amo vada ema. Ia sibona ese dina, hisiu, hua, tanobada mai gauna iboudiai vada e kara.
6. Taunimanima be ede amo ema ?
Idia danu Dirava ese e havaradia, eda mauri idoinai danu Iena amo vada e maimu.
7. Taunimanima edia kara be ede heheto ?
Taunimanima edia kara na nega momo didika, ita iboudai ese Dirava ena taravatu vada ta tatautu.
8. Badina be dahaka unu kara dikadia baita rakatani ?
Badina be unu kara dikadia ese laumada bae hamase na garina.
9. Eda kara dikadia be mai goadadia ; bena ede baita rakatani toma ?
Iesu Keriso siahuna ese baine harohoda mauri.

10. Una Iesu Keriso na daika ?
Ia na Dirava ena lalokau Natuna, tanobada vada
ema, Tamada ena kara ihadibalaida totona.
11. Ia na ede ema toma ?
Karukarunai vada ema, hahine ta ladana be Mary,
iena amo vada e vara.
12. Ia ese dahaka e karava ?
Vada e badahobadahoho ela bona vada e ha eregabe,
bena e loava, e hahenamova, taunimanima e
hadibadiava, edia kara dikadia bae rakatani,
Dirava ena ura bae badinaia.
13. Ia na ede e mase toma ?
Idurudia totona vada ema taudia ese vada e alaia.
Idia ese tauna satauro dorinai vada e kokoa kau,
bena unuseni ai vada e rakatania baine mase.
14. Dahaka dainai idia ese e hasatauroa ?
Badina be edia kara gunadia vada e ura heniva,
lalodia danu didibura.
15. Badina be dahaka Keriso na satauro dorinai vada
e mase ?
Tamada ena lalokau taunimanima edai. Ena
mauri vada e heni, bena vada e mase, eda kara
dikadia amo baine harohoda mauri urana.
16. Keriso na harihari vada e mase a ?
Lasi, laumana na vada e mauri hanaihanaimu,
bona dekedekedai danu noho.
17. Mase murinai baita mauri a ?
Oibe. Mase ese tau anida vada e hamasemu, a
laumada be mamauri.
18. Iesu Keriso ese vada e haŋoevadia bona edia kara
dikadia vada e rakatani laumadia na edeseni ai
bae mauri noho ?
Iesu Keriso ese vada e abia heŋaeŋae gabunai.

19. Keriso ibadinana tauna be daika ?
Dirava e abidadama heniamu bona Iesu Keriso murinai e raka tohomu tauna.
20. Ekalesia be dahaka ?
Ekalesia na Keriso ikamonaihenina taudia edia oreka Keriso ena kara ibadinadia bae heduru heheni totona.
21. Bapatiso be dahaka ?
Una be ranu ai toadia e karamu Iesu Keriso igavana e gwauraia hamatamu taudia tubuadai.
22. Karukarudia e bapatisodiamu be dahaka ?
Una be ranu ai toadia e karamu tamadia sinadia ese vada e hahelaḡadiamu karukarudia tubuadai.
23. Lohiabada ena Anibou Helaḡana be dahaka ?
Ekalesia taudia edia hebou bunai Iesu Keriso ihelalolaina totona, areto bae bakia bona kehere bae inua neganai ; Laumana danu dekedai bainema areto ianinai bona kehere inunai.
24. Revareva Helaḡana be dahaka ?
Revareva Helaḡana na buka idauidau ihaboudia, taunimanima ese vada e tore, Dirava ilalohadailaina bona Iesu Keriso ena hahediba bona Ena ḡau kara danu taunimanima iboudai edai vada e tore hedinarai.

